

- 18वीं लोकसभा रा चुनाव रा तैत चार जून ने होवण वाळी वोटां री गिणती ने ले र प्रदेश रा न्यारा-न्यारा ज़िला मांय तैयारियां चाले ।
- देश मांय ई साल मई मीना सारू सकल वस्तु अर सेवाकर-जीएसटी राजस्व एक लाख 73 हजार करोड़ रुप्यां भेळो व्हयो ।
- आथूणी विक्षोभ रा असर ऊं राज्य मांय केई ठौड़ां व्ही बिरखा ऊं लोगां ने गर्मी ऊं मिली राहत ।
- प्रदेश रा रोडवेज कार्मिकां री हाजरी अबै व्हेला मोबाईल ऐप री मार्फत ।

000

18वीं लोकसभा रा चुनाव रे तैत चार जून ने होवण वाळी वोटां री गिणती ने ले र प्रदेश मांय न्यारा-न्यारा ज़िलां मांय तैयारियां करी जाय री है । ज़िला चुनाव अहलकार मतगणना री ठौड़ रो दौरा कर ने बन्दोवस्ता ने आखिरी रूप देवण माथे लाग्या है । सर्वाईमाधोपुर मांय लोकसभा चुनाव रा वोटां री गिणती ने देखता जिला प्रशासन 3 ऊं 5 जून ताई धारा-144 लागू करण रा हुकम दिया है । अलवर ज़िला चुनाव अहलकार आशीष गुप्ता मतगणना थळ बाबू शोभाराम कला महाविद्यालय रो निरीक्षण कर्यो अर बन्दोवस्तां रो जायजो लियो । भरतपुर मांय ज़िला कलेक्टर अर जिला पुलिस अधीक्षक महारानी श्री जया कॉलेज रो निरीक्षण कर ने अहलकारां ने जरूरी दिशा-निर्देश दिया । अजमेर ज़िला कलेक्टर डॉ. भारती दीक्षित ई अहलकारां री मीटिंग ले र सगळां इन्तजाम तैय करण रा निर्देश दिया । वणा मतगणना कर्मियां ने तालमेळ रे साथे काम करण ने कह्यो ।

000

अरुणाचल प्रदेश अर सिक्किम मांय विधानसभा चुनाव री मतगणना रा सगळां नतीजा मिल ग्या है । अरुणाचल प्रदेश मांय भारतीय जनता पार्टी सत्ता कायम राख्यी है । सिक्किम मांय सत्ताधारी सिक्किम क्रांतिकारी मोर्चा री एकतरफा जीत व्ही है । अरुणाचल प्रदेश मांय भारतीय जनता पार्टी 36 सीटां माथे जीती । पांच सीट नेशनल पीपल्स पार्टी रा खाता मांय ग्यी है । पीपल्स पार्टी ऑफ अरुणाचल ने दो, एनसीपी ने तीन, निर्दलीय उम्मीदवारां ने तीन अर कांग्रेस ने एक सीट मिली है । 60 सदस्यां वाळी विधानसभा मांय भाजपा 10 सीटां माथे पैला ई निर्विरोध जीत हासिल कर ली ही । वठे ई सिक्किम मांय ई सगळा 32 नतीजा मिल ग्या है । सिक्किम क्रांतिकारी मोर्चा 31 सीटां माथे जीत हासिल करी है । एक सीट सिक्किम डेमोक्रेटिक फ्रंट ने मिली । आं विधानसभावां रो काम-काज आज पूरो व्हे रह्यो है । पूर्वोत्तर रा आं दोन्यू राज्यां मांय विधानसभा अर लोकसभा चुनाव सारू 19 अप्रैल ने वोट पड्या हा ।

000

देश मांय ई साल मई मीनां सारू सकल वस्तु अर सेवा कर-जीएसटी राजस्व एक लाख 73 हजार करोड़ रुप्यां भेळो व्हयो है । वित्त मंत्रालय बतायो के ओ 10 फीसदी बढवार ने दरसावे है ।

मई मीनां रा कुल भेळां जीएसटी मांय 32 हजार करोड़ रुप्यां ऊं बत्ती राज्य वस्तु अर सेवा कर, 40 हजार करोड़ रुप्यां ऊं बत्ती अर एकीकृत वस्तु अर सेवा कर 87 हजार 781 करोड़ रुप्यां ऊं बत्ती अर उपकर 12 हजार करोड़ रुप्यां ऊं बत्ती है । मंत्रालय बतायो के रिफंड रो लेखांकन करण रे पछे लारला मीनां रो शुद्ध जीएसटी राजस्व एक लाख 44 हजार करोड़ रुप्या है । ओ लारली साल री इण बगत री तुलना मांय 6 दशमलव 9 फीसदी री बढवार ने दरशावे है ।

000

प्रदेश मांय वैकल्पिक ऊर्जा स्रोत रा रूप मांय सौर ऊर्जा ने काम मांय लेवण सारू बरोबर बढावो मिल रह्यो है। ईणी करी मांय पाली रा कृषि विज्ञान केंद्र कानी ऊं सोलर ट्री रो प्रयोग करी ज्यो है। इण तरह रो प्रयोग खेती री जमीन सारू उपयोगी साबित व्हे रह्यो है।

000

पंजाब रा फतेहगढ साहिब मांय आज तडके लुधियाना—अम्बाला मुख्य खास रेल मार्ग माथे दो मालगाडियां टकरा ग्यी। इण ऊं 51 रेलगाडियां री आवाजाही माथे असर पड्यो है अर सात रेलगाडियां निरस्त कर दीरीजी है।

000

आज तेलंगाना राज्य रो थापना दिवस है। ई मौके जयपुर मांय राजभवन मांय आज तेलंगाना थापना दिवस मनायी ज्यो। राज्यपाल कलराज मिश्र ई मौके बधाई अर शुभकामनावां देवेता तेलंगाना रा रेहवणियां लोगां ऊं मिल ने बतळ ई करी। श्री मिश्र तेलंगाना रा इतिहास री चर्चा करता इण ने प्रदेश रा पर्यटन ऊं ई समृद्ध बताया। राज्यपाल मिश्र कह्यो के राजभवन मांय राज्यां रा थापना दिवस मनावण रे पाछे भावना आई है के एक भारत श्रेष्ठ भारत री सोच ऊं आपा सब जुड़ सकां। वणा कह्यो के न्यारा—न्यारा राज्यां मांय बोली, रहन—सहन, खान—पान री विविधता रे पछे ई आपा रे अठे एकता रो भाव है। इण ऊं समरस्ता रो निर्माण होवे है। ई मौके तेलंगाना रा स्थानीय लोगां राजस्थान रा अपणायत भर्या वातावरण री सराहवना करी।

000

प्रदेश मांय आथूणी विक्षोभ रे सक्रिय होवण ऊं प्रदेश रा केई ठौड़ां माथे तेज हवा रे साथे बिरखा होवण ऊं लोगां ने गर्मी ऊं थोड़ो आराम मिल्यो है। मौसम मेहकमां मुजब प्रदेश मांय सब ऊं बत्ती 46 दशमलव 2 डिग्री सेल्सियस बत्ती रो तापमान श्रीगंगानगर मांय दर्ज करी ज्यो। सवाईमाधोपुर मांय आज ई करड़ी गर्मी रो असर बण्योडो है। न्यारा—न्यारा सामाजिक संगठना कानी ऊं राह चालण वाळां ने ठण्डो पाणी पिलावण रा इन्तजाम करी ज्या है। बूंदी में आज भी तेज गर्मी का दौर जारी रहा। कोटा मांय मौसम आया बदलाव रे चालता तापमान मांय एकर फेरू बढवार दर्ज करी ज्यी है। म्हाणा खबरनवीस बतायो के करड़ी गर्मी ने देखता जिला कलेक्टर दोपहर री बगत कोचिंग संस्थान बंद राखण अर ऑन लाइन कोचिंग देवण रा निर्देश दिया है।

नीम का थाना जिला मांय आज आखे दिन बादळ छायी ज्या रिया अर कुछ ठौड़ां छाटा—छिडको व्ह्यो। टोंक अर केकडी जिला मांय ई आज केई ठौड़ां तेज हवां रे साथे बिरखा व्ही। इण ऊं लोगां ने गर्मी ऊं राहत मिली। मौसम महकमां मुजब आज ई बीकानेर, जयपुर, भरतपुर, अजमेर अर जोधपुर संभाग रा कुछ हलकां मांय दोपहरा पाछे मेघगर्जन अर बिरखा री आस जतायी ज्यी है। ई दौरान कठे—कठे तेज आंधी चालण रो अन्दाजो है। चार जून रे पछे आथूणी जिला मांय एकर फेरू तापमान बधण अर हीटवेव रो दौर सरू होवण री आस है।

000

प्रदेश रा रोडवेज कार्मिकां री हाजिरी अबे मोबाइल ऐप री मार्फत दर्ज व्हेला। कर्मचारियां रे बिना बताया गैर हाजिर होवण अर मनमर्जी माथे रोक लगावण सारू रोडवेज मोबाइल ऐप री मार्फत हाजरी लगावण रो फेरू कर्यो है। ई सारू हर डिपो ऊं दो—दो कार्मिकां ने मुख्यालय मांय सिखावण दीरीजी है। बूंदी डिपो री मुख्य प्रबन्धक सुनीता जैन बतायो के सगळां कार्मिकां रा मोबाइल मांय ऐप डाउनलोड करण री प्रक्रिया सरू कर दीरीजी है।

000

प्रदेश मांय आज अपरा एकादशी रे मौके न्यारा—न्यारा धार्मिक कार्यक्रम व्हे रिया है। पाली मांय ई मौके केई ठौड़ां समाज समाजसेवियां कानी ऊं शरबत पिलायी ज्यो। वठे ई मिन्दरां मांय श्रीहरि कथा सुणावण रे साथे भगवान रो अभिषेक अर मोवणो सिणगार करी ज्यो। टोंक मांय ई मौके पाणी री छबील लगाई ज्यी अर राहगीरां ने शरबत पिलायी ज्यो तथा परिंडे बांधे गये।

000

प्रदेश मांय मिलावट रे खिलाफ चलाया जा रहया अभियान रा तैत काले खाद्य सुरक्षा महकमो जयपुर रा केई हलकां मांय कार्रवाही कर ने नकळी अर मिलावटी खावण री चीजां जब्त करी है। खाद्य सुरक्षा महकमां रा अतिरिक्त आयुक्त बतायो के ई दौरान कानोता हलका मांय तीन हजार दो सौ किलो सॉस ने नष्ट करवायी ज्यो । वणा बतायो के ओ वेजिटेबल सॉस 25 प्लास्टिक रा ड्रमां मांय भरी ज्यो हो अर ओ गुणवत्ता मांय घटियां अर रंग मिला र तैयार करी ज्यो हो ।

000

श्रीगंगानगर मांय गंग नहर फीडर ऊं नहरी पाणी री चोरी रोकण सारू जल संसाधन महकमां रा अहलकारां दौरो कर ने हालात रो जायजो लियो । दल रा सदस्यां खंखा अर शिवपुर हैड अर लिंक चैनल ताई फीडर ने देख्या अर गैर कानूनी पाईपा ने हटवायां । इ दौरान सहायक अभियंता कार्मिकां ने फीडर रो निरीक्षण करण अर प्वाइंट्स री जीपीएस पोजिशन बरोबर रूप ऊं साझां करण रा निर्देश दिया ।

000

अखिल भारतीय तकनीकी शिक्षा परिषद, गुणवत्ता सुधार कार्यक्रमां रा तैत कोर इंजीनियरिंग संकाय सदस्यां ने सिखावण सारू आर्टिफिशियल इंटेलिजेंस-एआई अर डेटा विज्ञान रा हलकां मांय कम बगत रा कोर्स सारू कर री है। ई साल तमिलनाडु रा कॉलेजां मांय एआई अर डेटा साइंस ने दूसरा सब ऊं बत्ती मांग वाळां कोर्स रा रूप मांय देख्यो जावे। राज्य मांय निजी संस्थानां कानी ऊं केई सर्टिफिकेट कोर्स चलाया जावे ।

बाजार मांय बधती मांग ने ध्यान मांय राखता ए.आई अर डेटा साइंस एनालिटिक्स माथे बत्ती कोर्स चलावण री कोशिश करी जावे। अन्ना विश्वविद्यालय रे तैत आवण वाळां इंजीनियरिंग कॉलेजां मांय इण साल 25 हजार सीटां जोडी ज्यी है ।

000

मानसून सीजन ने देखता जंगळात मेहकमो पौध रोपण री तैयारियां तेज करी दी है। भरतपुर अर डीग जिला री 10 नर्सरी मांय कोई 11 लाख छायादार, फलदार अर फूलदार पौधा तैयार कर्या जावे। आ पौधां मांय सब ऊं बत्ती बरगद पीपल, आम, शीशम, इमली, गूगल, नीम पौधा है। नर्सरी मांय तैयार आ पौधा मांय ऊं कोई 5 लाख पौधा सरकारी जमीन, चारागाह भूमि, ग्राम पंचायत ,शहरी हलका रा नगर निगम ,नगर पालिका री जमीन माथे लगाया जायेला ।

000